

Կարծիք

Վահագն Ավետիսի Հարությունյանի՝ «Կիլիկիո Հայոց կաթողիկոսությունը 1902-1921թթ. ազգային-քաղաքական գործընթացների համատեքստում» Թ.00.05 - «Կրոնի տեսություն և պատմություն (պատմական գիտություններ)» մասնագիտությամբ պատմական գիտությունների թեկնածուի գիտական աստիճանի հայցման ատենախոսության մասին

Հայոց պատմության անբաժանելի մասն է հանդիսանում Հայ եկեղեցու պատմությունը, որի համակողմանի և համապարփակ ուսումնասիրումն արդի հայաստանյան պատմագիտության կարևոր հիմնախնդիրներից է: Հայ եկեղեցու պատմության տարաբնույթ հիմնահարցերի հետազոտումն ամբողջացնում և նոր տեսանկյունից է ներկայացնում մեր ժողովրդի պատմության հայտնի, իսկ երբեմն էլ քիչ հայտնի իրադարձություններն ու դեպքերը: Այս համատեքստում խիստ կարևորվում է Հայ եկեղեցու նվիրապետական աթոռների պատմության գիտական ուսումնասիրումը: Հայտնի է, որ պատմական ճակատագրի բերումով դեռևս 5-րդ դարի 80-ական թ.-ից հայոց եկեղեցին լքել է իր պատմական նստավայրը՝ Սուրբ Էջմիածինը և շուրջ հազար տարի հանգրվանել զանազան այլ վայրերում՝ հասնելով մինչև Կիլիկիա:

Կաթողիկոսական աթոռի այս դեգերումներն անհետևանք չեն մնացել: Հայաստանեայց առաքելական եկեղեցու նվիրապետական համակարգում առաջացել է նոր կաթողիկոսական աթոռ՝ Կիլիկիո կաթողիկոսությունը: Կիլիկիո աթոռը սկսելով իր պատմական ուղին՝ սկսած 15-րդ դարի 40-ական թթ. կարևոր դերակատարում է ունեցել հայության մի կարևոր հատվածի՝ կիլիկիահայության կյանքում, իսկ 1921 թ. Կիլիկիայից տարագրվելուց հետո վճռորոշ դեր է խաղացել նաև ցեղասպանությունը վերապրած և սփյուռքացման գորընթացների մեջ հայտնված հայության ցրյալ հատվածի նոր պայմաններում հաստատվելու և ազգային նկարագիրը պահպանելու գործում: Զարմանալիորեն հայաստանյան պատմագիտությունը խիստ նվազ չափով է գիտական հետազոտության ենթարկել Կիլիկիո պատմության հարցերը՝ ի մասնավորի

գիտականորեն գրեթե լուսաբանված չէ վերջինիս գործունեությունը 20-րդ դարում: Առկա հետազոտությունները հիմնականում կատարվել են սփյուռքում, որոնց մեծ մասն էլ իրականացվել են հենց Կիլիկիո կաթողիկոսության պատվերով ու ջանքերով: Առանձին դեպքերում այդ աշխատությունների մեծ մասն ավելի շատ ունեն աղբյուրագիտական նշանակություն:

Կիլիկիո կաթողիկոսության պատմության թերևս ամենաքիչ ուսումնասիրված շրջափուլերից է հանդիսանում 20-րդ դարի առաջին երկու տասնամյակների բախտորոշ ժամանակաշրջանը, որի կարևորագույն հիմնախնդիրների պատմաքննական հետազոտությանն է նվիրված Վահագն Հարությունյանի սույն ատենախոսությունը: Կարևոր ենք համարում ընդգծել, որ հեղինակը Կիլիկիո կաթողիկոսության պատմության անցքերը հիրավի ներկայացնում է տվյալ ժամանակաշրջանի ազգային-քաղաքական կյանքի համատեքստում՝ փորձելով կաթողիկոսական աթոռի պատմությունը շաղախել ազգային պատմության հորձանքին՝ որպես դրա մի կարևոր բաղադրիչ:

Անդրադառնալով ատենախոսությանը՝ նշենք, որ աշխատանքի անառարկելիորեն ուժեղ կողմերից և առավելություններից է հանդիսանում աղբյուրագիտական հարուստ հենքը: Հեղինակն աշխատանքը շարադրել է արխիվային հարուստ նյութերի ուսումնասիրմամբ, որոնց թվում տեղ են գտել Հայաստանի ազգային արխիվի, Փարիզի Նուբարյան գրադարանի արխիվի, Ե. Չարենցի անվան ԳԱԹ-ի արխիվի, Մատենադարանի, Կահիրեի ազգային առաջնորդարանի արխիվի, Մոսկվայի Ռուսական կայսրության արտաքին քաղաքականության արխիվի վավերագրերը: Ատենախոսության մեջ տեղ են գտել նաև առանցքային նշանակություն ունեցող արխիվային փաստաթղթերի բազմաթիվ ժողովածուներ, ժամանակի պարբերական մամուլի նյութեր, ինչպես նաև թեմային առնչվող մեծ քանակությամբ մենագրություններ, գիտական հրապարակումներ և համացանցային նյութեր:

Ատենախոսության աչքի զարնող առավելություններից են աշխատանքի վերջում ներկայացված թվով 7 հավելվածներն ու տարբեր աղյուսակները: Հեղինակը բժախնդիր հետազոտողի աշխատասիրությամբ հավելվածներում կազմել և ներկյացրել է Կիլիկիո

կաթողիկոսների, կաթողիկոսության միաբանների, թեմերի, կալվածքների, նահատակված հոգևորականների և մի շարք այլ հարցերին վերաբերյալ համակարգված տեղեկատվություն: Հավելվածներում կատրվել են նաև բազմաթիվ պատմագիտական և փաստական ճշգրտումներ:

Հեղինակը աշխատանքը շարադրելիս ցուցաբերել է գիտական աշխատանք կատարելու բարձր ունակություններ, փաստերը ներկայացրել է քննադատաբար, դրանք ենթարկել վերլուծությունների, կատարել համադրություններ և բխեցրել սեփական եզրահանգումները:

Ատենախոսությունը բաղկացած է երեք գլուխներից, նախաբանից և եզրակացություններից: Շահեկանորեն առանձնանում է նաև ատենախոսության կառուցվածը: Աշխատանքի երեք գլուխները և համապատասխան ենթագլուխները իրենց հերթին՝ ըստ ներկայացված հիմնահարցերի, բաժանված են առանձին ենթաբաժինների:

Ատենախոսության առաջին գլուխը նվիրված է Սահակ Բ Խապայանի կաթողիկոսության առաջին շրջանին՝ 1902-1914 թթ. գործունեությանը: Մեր կարծիքով հատկապես հաջողված կարելի է համարել ատենախոսության երկրորդ գլուխը: Այստեղ հեղինակն անդրադառնալով Առաջին աշխարհամարտի տարիներին հայության համար ստեղծված օրհասական վիճակին՝ հասուն եկեղեցաբան-պատմագետի խորաթափանցությամբ վերլուծում է այդ տարիներին թուրքական իշխանությունների կողմից արհեստականորեն ստեղծված Օսմանյան կայսրության հայոց հոգևոր առաջնորդի՝ «կաթողիկոս-պատրիարքի» գործունեությունն ու համապատասխան կանոնագիրը: Հեղինակը չի վարանում օբյեկտիվ գնահատականներ հնչեցնել Սահակ Բ-ի այս շրջանի գործունեության վերաբերյալ՝ քննադատելով այն և իրավացիորեն վերջինիս գործունեության երուսաղեմյան շրջանն համարելով «անփառունակ» (էջ 140): Սահակ Բ-ի գործունեությունը հեղինակի կողմից քննադատության է արժանանում նաև այլ դրվագներում (էջ 112-114 և այլ): Հիրավի չի կարելի չհամաձայնվել նաև ատենախոսի թուրքական իշխանությունների հեղինակած արհեստածին «Կանոնագիր հայոց կաթողիկոսության և պատրիարքության» փաստաթղթին տված գնահատականի

հետ, երբ վերջինս այն համարում է «ցեղասպանության քաղաքականությունից փրկված արևմտահայերի նկատմամբ երիտթուրքերի նոր քաղաքականության անմիջական դրսևորում» (էջ 128) : Այս գլխում ատենախոսը նոր լույսի ներքո է ներկայացնում նաև Կիլիկիո կաթողիկոսության դրական դերակատարումը՝ ցեղասպանության տարիներին կիլիկիահայության շրջանում համեմատաբար քիչ զոհեր ունենալու տեսանկյունից:

Իր առանձնահատկությամբ աչքի է ընկնում նաև ատենախոսության վերջին՝ երրորդ գլուխը: Այստեղ ատենախոսն առատ աղբյուրագիտական նյութի օգնությամբ ներկայացրել է Կիլիկիո կաթողիկոսության կիլիկյան շրջանի գործունեության վերջին շրջափուլը՝ ցույց տալով Կիլիկիո աթոռի հսկա դերակատարումը պատերազմի ավարտից հետո կիլիկիահայության հայրենիք վերադառնալու և ազգային հոգևոր կյանքի վերակազմակերպման գործընթացում: Աշխատանքի վերջին ենթագլուխը նվիրված է Սահակ Բ-ի 1920թ. Եվրոպա կատարած ուղևորությանը: Այն թերևս այդ իրադարձությանը և դրա հետևանքներին նվիրված գիտական առաջին անդրադարձն է հայաստանյան պատմագիտության մեջ:

Ներկայացնենք որոշ առաջարկություններ և նկատառումներ.

- Նախ կարծում ենք, աշխատանքը կշահեր, եթե հեղինակն առանձին գլխով անդրադառնար Կիլիկիո կաթողիկոսության հարաբերություններին Մայր Աթոռի և հայոց եկեղեցու մյուս նվիրապետական աթոռների հետ: Ճիշտ է ատենախոսն այս հարաբերություններին անդրադառնում է ատենախոսության տարբեր դրվագներում (օրինակ էջ 49-50 և այլն), սակայն առանձին անդրադարձը կընդգծեր այդ հիմնախնդրի կարևորությունը:
- Հաշվի առնելով Կիլիկիո կաթողիկոսության գործունեության խնդրո առարկա ժամանակաշրջանի առանձնահատկությունները՝ կաևոր էր նաև անդրադառնալ վերջինիս հարաբերություններին հայ հարանվանական մյուս ուղղությունների՝ հայ կաթոլիկների և հայ բողոքականների հետ:
- Աշխատանքում գրեթե անդրադարձ չկա հայ ազգային կուսակցությունների դիրքորոշմանը Կիլիկիո կաթողիկոսության հանդեպ, խոսքը հատկապես գնում է

Առաջին համաշխարհային տարիներին «կաթողիկոս-պատրիարքության» խնդրահարույց շրջանի և առհասարակ կաթողիկոսության կարգավիճակի և առհասարակ հայության կյանքում ունեցած դերակատարման մասով: Այս տեսակետների ընդհանրացումը խիստ հետաքրքրական կլիներ հատկապես այն առումով, որ Կիլիկիո կաթողիկոսության տարագրությունից հետո վերջինիս հարաբերությունները ազգային կուսակցությունների հետ ձեռք բերեցին բավականին ինքնատիպ առանձնահատկություններ:

- Քանի որ աշխատանքը ժամանակագրական առումով ընդգրկում է մինչև 1921թ., կարծում ենք ավելի շահեկան կլիներ, եթե ատենախոսը ավելի մեծ ծավալ հատկացներ նաև հենց այդ թվականին տեղի ունեցած հիմնական իրադարձություններին:
- Թեև աշխատանքն ունի ընդգծված հարուստ աղբյուրագիտական հենք, անխոս այն կշահեր, եթե հնարավորության դեպքում օգտագործվեին նաև Անթիլիասի կաթողիկոսարանում պահվող արխիվային նյութերը:
- Հեղինակը ատենախոսության առաջին հատվածում անդրադառնում է նաև Կիլիկիայի հայ բնակչության թվաքանակի հետ կապված հարցերին: Այս իմաստով աշխատանքը կշահեր, եթե ատենախոսն օգտագործեր նաև Ռ. Թաթոյանի հեղինակած «Կիլիկիահայության թիվը Հայոց ցեղասպանության նախօրյակին», Երևան, 2021, արժեքավոր աշխատությունը:

Ներկայցված առաջարկություններն ու նակատառումներն ամենևին էլ չեն նսեմացնում կատարված և գնահատանքի արժանի ատենախոսության արժեքը: Ամփոփելով, արձանագրենք, որ Վահագն Հարությունյանի՝ «Կիլիկիո Հայոց կաթողիկոսությունը 1902-1921թթ. ազգային-քաղաքական գործընթացների համատեքստում» խորագիրը կրող սույն ատենախոսությունը հայաստանյան պատմագիտության մեջ, ըստ էության, Կիլիկիո կաթողիկոսության 20-րդ դարի առաջին երկու տասնամյակների պատմության և աթոռի գործունեության գիտական ուսումնասիրության առաջին փորձն է, որը հեղինակը կատարել է հաջողությամբ:

Լինելով հիմնախնդրի հայաստանյան իրականության մեջ առաջին հետազոտողներից մեկը՝ հեղինակին հաջողվել է հաղթահարել իր առջև դրած խնդիրները և ներկայացնել համակարգված հետաքրքիր մի հետազոտություն, որը պարունակում է գիտական նորոյթ և անխոս իր ներդրումը կրթի հայրենի պատմագիտության և եկեղեցագիտության զարգացման գործում:

Ելնելով, վերը նշվածից, կարծում ենք, որ Վահագն Հարությունյանի՝ «Կիլիկի Հայոց կաթողիկոսությունը 1902-1921թթ. ազգային-քաղաքական գործընթացների համատեքստում» խորագրով թեկնածուական ատենախոսությունն ամբողջությամբ համապատասխանում է ներկայացվող պահանջներին, ուստի հաշվի առնելով կատարված բարեխիղճ աշխատանքը միջնորդում ենք պատմական գիտությունների գիտական աստիճաններ շնորհող «Կրոնի տեսություն և պատմություն» մասնագիտական խորհրդին Վահագն Ավետիսի Հարությունյանին շնորհել իր հայցած պատմական գիտությունների թեկնածուի գիտական աստիճան, որին նա լիովին արժանի է:

Պաշտոնական ընդդիմախոս՝

Է.Գ. ՀՈՎՀԱՆՆԻՍՅԱՆ

Երևանի Խ. Աբովյանի անվան հայկական պետական մանկավարժական համալսարանի Հայոց պատմության ամբիոնի դոցենտ, պատմական գիտությունների թեկնածու

Հայոց պատմության ամբիոնի դոցենտ, պատմական գիտությունների թեկնածու

Է. Գ. Հովհաննիսյանի ստորագրությունը հաստատում եմ:

Խ. Աբովյանի անվան ՀՊԱՀ-ի Ուսումնագիտական հարցերի գծով պրոռեկտոր, գիտական քարտուղար՝



Մ.Մ. ԻՍՊԻՐՅԱՆ

մանկ. գիտ. թեկնածու, դոցենտ

20. 05. 2022թ.